

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 1/6

13 հունվարի 2017թ.

Քննարկվեց «Հայաստանի էլեկտրական ցանցեր» ՓԲԸ գանգատը ՀՀ ԿԱ ՊԵԿ Արարատյան տարածաշրջանային մաքսատան պետի 28.11.2016թ. թիվ 431/10 որոշման դեմ:

«Հայաստանի էլեկտրական ցանցեր» ՓԲԸ գանգատում բերված փաստարկները.

ՀՀ ԿԱ ՊԵԿ Արարատյան տարածաշրջանային մաքսատան պետի կողմից 28.10.2016թ. կայացվել է «Վարչական տուգանք նշանակելու մասին» թիվ 431/10 որոշումը (այսուհետ՝ Որոշում), որով «Հայաստանի էլեկտրական ցանցեր» ՓԲԸ տնօրենի նկատմամբ կիրառվել է վարչական տույժ՝ նշանակվել է տուգանք 50.000 դրամի չափով՝ հիմք ընդունելով Վարչական իրավախախտումների վերաբերյալ ՀՀ օրենսգրքի 169.2-րդ հոդվածը: Որոշման մեջ նշված է, որ «Հայաստանի էլեկտրական ցանցեր» ՍՊԸ-ն սեպտեմբեր ամսին ԵՏՄ անդամ երկրների հետ փոխադարձ առևտուր իրականացնելիս չի ներկայացրել վիճակագրական հաշվետվություններ՝ համաձայն ՀՀ ԿԱ ՊԵԿ նախագահի առաջին տեղակալի 18.10.2016թ. թիվ 02/7-1/(1223598)-16 գրության»: Սակայն որոշմանը կցված չէ ՀՀ ԿԱ ՊԵԿ նախագահի վերոնշյալ գրությունը, և միաժամանակ, վարչական ակտից անհասկանալի է, թե կոնկրետ որ օրվա կամ որ կազմակերպությունից կամ որ պայմանագրի ներմուծման մասով ընկերությունը չի ներկայացրել վիճակագրական հաշվետվություն, հատկապես այն պարագայում, երբ իրականում ընկերությունը սահմանված ժամկետում ներկայացրել է սեպտեմբերին ԵՏՄ-ից ներմուծված բոլոր ապրանքների վերաբերյալ վիճակագրական հաշվետվությունները:

Հարկ է նշել, որ «Վարչական տուգանք նշանակելու մասին» վերոնշյալ որոշումը ոչ միայն հիմնավորված չէ, այլ նաև կազմված է մի շարք խախտումներով: Մասնավորապես, չի պահպանվել «Վարչարարության հիմունքների և վարչական վարույթի մասին» ՀՀ օրենքի 55-րդ հոդվածի 1-ին կետի պահանջները, որոնց համաձայն վարչական ակտը պետք է նշում պարունակի այն բոլոր էական փաստական և իրավաբանական հանգամանքների վերաբերյալ, որոնք վարչական մարմնին հիմք են տվել ընդունելու համապատասխան որոշում և վարչական ակտը պետք է կազմված լինի սահմանված ձևի և նմուշի թղթի վրա:

Ելնելով վերոգրյալից՝ գանգատաբերը գտնում է, որ կիրառելի չէ Վարչական իրավախախտումների վերաբերյալ ՀՀ օրենսգրքի 169.2-րդ հոդվածը:

Ելնելով վերոշարադրյալից՝ գանգատաբերը խնդրում է բեկանել ՀՀ ԿԱ ՊԵԿ Արարատյան տարածաշրջանային մաքսատան պետի կողմից 28.11.2016թ. կայացված «Վարչական տուգանք նշանակելու մասին» թիվ 431/10 որոշումը և կարճել վարչական վարույթի գործը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ Արարատյան տարածաշրջանային մաքսատան պետի կողմից 28.11.2016թ. կայացվել է թիվ 431/10 որոշումը, որում մասնավորապես նշված է.

ՀՀ ԿԱ ՊԵԿ Արարատյան տարածաշրջանային մաքսատան պետը, վերանայելով «Հայաստանի էլեկտրական ցանցեր» ՍՊ ընկերության տնօրեն Կարեն Հարությունյանի կողմից վարչական իրավախախտում կատարելու վերաբերյալ նյութերը պարզել է, որ «Հայաստանի էլեկտրական ցանցեր» ՍՊ ընկերությունը սեպտեմբեր ամսին ԵՏՄ անդամ երկրների հետ փոխադարձ առևտուր իրականացնելիս չի ներկայացրել վիճակագրական հաշվետվություններ՝ համաձայն ՀՀ ԿԱ ՊԵԿ նախագահի առաջին տեղակալի 18.10.2016թ. թիվ 02/7-1/1223598-16 գրության: Վիճակագրության վարման կանոնները և ապրանքների փոխադրման հաշվառման վիճակագրական ձևը սահմանված է ՀՀ կառավարության 23.04.2014թ. թիվ 447-Ն որոշմամբ, որի 7-րդ կետը սահմանում է, որ անկախ ապրանքներ տեղափոխող տրանսպորտի տեսակից վիճակագրական ձևը լրացվում է բոլոր ապրանքների համար: Իսկ 8-րդ կետի համաձայն՝ վիճակագրական ձևը պետք է ներկայացվի ոչ ուշ քան առաքման (ստացման) ամսվան հաջորդող ամսվա 10-ը:

Այսինքն, «Հայաստանի էլեկտրական ցանցեր» ՍՊ ընկերությունը խախտել է սահմանված կարգը, ինչն էլ հանդիսանում է ՎԻՎՕ-ի 169.2 հոդվածի խախտում: Վերջինս վարչական պատասխանատվություն է սահմանում պետական վիճակագրական դիտարկումների իրականացման համար անհրաժեշտ տվյալներ ներկայացնելու կարգը խախտելու կամ տվյալներն աղավաղելու համար:

«Հայաստանի էլեկտրական ցանցեր» ՍՊ ընկերության տնօրեն Կարեն Հարությունյանը թույլ է տվել ՎԻՎ օրենսգրքի 169.2-րդ հոդվածով սահմանված կանոնների խախտում:

Ելնելով վերոգրյալից և ղեկավարվելով ՀՀ Մաքսային կարգավորման մասին ՀՀ օրենքի 60-րդ և ՀՀ վարչական իրավախախտումների վերաբերյալ օրենսգրքի 14-րդ, 32-րդ և 234-րդ հոդվածներով ՀՀ ԿԱ ՊԵԿ Արարատյան տարածաշրջանային մաքսատան պետի կողմից 28.11.2016թ. կայացվել է թիվ 431/10 որոշումը (այսուհետ նաև՝ Որոշում), որի համաձայն «Հայաստանի էլեկտրական ցանցեր» ՍՊ ընկերության տնօրենը ենթարկվել է վարչական պատասխանատվության՝ գումարով 50.000 դրամի չափով:

Վերոգրյալի կապակցությամբ հարկ է նշել հետևյալը.

Նախ հարկ է նշել, որ Որոշման մեջ սխալ է նշված կազմակերպության կազմակերպատիրական տեսակը: Մասնավորապես, Որոշումը կայացվել է «Հայաստանի էլեկտրական ցանցեր» ՍՊ ընկերության տնօրենի նկատմամբ, այն դեպքում, երբ «Հայաստանի էլեկտրական ցանցեր» կազմակերպության կազմակերպատիրական տեսակը փակ բաժնետիրական ընկերություն է:

Բացի այդ, «Վարչարարության հիմունքների և վարչական վարույթի մասին» ՀՀ օրենքի 55-րդ հոդվածի 1-ին մասի «ա» կետի համաձայն՝ վարչական ակտն իր

բովանդակությամբ պետք է համապատասխանի դրա ընդունման համար օրենքով սահմանված պահանջներին, նշում պարունակի այն բոլոր էական փաստական և իրավաբանական հանգամանքների վերաբերյալ, որոնք վարչական մարմնին հիմք են տվել ընդունելու համապատասխան որոշում:

Նույն օրենքի 57-րդ հոդվածի 1-ին մասի համաձայն՝ Գրավոր կամ գրավոր հաստատված վարչական ակտը պետք է պարունակի հիմնավորում, որում պետք է նշվեն համապատասխան որոշում ընդունելու բոլոր էական փաստական և իրավական հիմքերը:

Քննարկվող դեպքում Որոշումը կազմվել է վերոգրյալ իրավանորմերով նախատեսված պահանջների խախտմամբ: Մասնավորապես, Որոշման մեջ ընդամենը նշված է, որ ընկերությունը սեպտեմբեր ամսին ԵՏՄ անդամ երկրների հետ փոխադարձ առևտուր իրականացնելիս չի ներկայացրել վիճակագրական հաշվետվություններ: Սակայն թե կոնկրետ որ գործարքին է դա վերաբերվում, Որոշման մեջ նշված չէ: Տվյալ դեպքում Որոշման մեջ կոնկրետ գործարքի մատնանշման հանգամանքը կարևոր է, քանի որ սեպտեմբեր ամսին ընկերությունը ԵՏՄ անդամ երկրների հետ իրականացրել է բազմաթիվ գործարքներ:

Քննարկման ընթացքում պարզվեց, որ մաքսային մարմնում առկա տեղեկությունների համաձայն «Հայաստանի էլեկտրական ցանցեր» ՓԲԸ-ի վերաբերյալ 2016թ. սեպտեմբեր ամսին կազմվել են թվով 17 տրանզիտ հայտարարագրեր, որոնց վերաբերյալ ընկերության կողմից ներկայացվել են թվով 16 վիճակագրական հաշվետվություններ: Ընդ որում, թվով երկու գործարքի վերաբերյալ ներկայացվել է մեկ վիճակագրական հաշվետվություն, որի «Փաստաթղթեր» դաշտում նշվել են նշված երկու տարանցիկ հայտարարագրերի վերաբերյալ համապատասխան տվյալները: Այսինքն՝ կարելի է արձանագրել, որ սեպտեմբեր ամսում կատարված բոլոր գործարքների վերաբերյալ վիճակագրական հաշվետվություններն ընկերության կողմից ներկայացվել են:

Ելնելով վերոգրյալից՝ Հանձնաժողովը գտնում է, որ գանգատը ենթակա է բավարարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

Բեկանել ՀՀ ԿԱ ՊԵԿ Արարատյան տարածաշրջանային մաքսատան պետի 28.11.2016թ. թիվ 431/10 որոշումը և կարճել գործը:

Հանձնաժողովի նախագահ՝



Վ.ՄԻՐՈՒՄՅԱՆ